



QUÆSTIO MEDICA,

*Cardinalitiis disputationibus manè discutienda in Scholis
Medicorum, die Jovis 11. Februarii 1712.*

M. NICOLAO BAILLY, Doctore
Medico, Præsides.

An alvo pigra Cassia ante cibum?

I.

EXCRETIONES ut decet perfecta sanitatem efficiunt, & tuentur. Inter illas non negligenda est, quæ crassiorum fecum est. Harum rejeccio, idoneum tempus, legitimumque servans modum, fir-
mam magis, ab injuriisque magis tutam præstat, sanam corpo-
ris constitutionem. Aliquandiù subsistit alvus, per anum ventrem, imò
per universum corpus persentitur diffusus calor, astrictæ alvi effectus,
non causa. Sed alvo prorsus pigra, Cephalalgia, Scotomata, aurium tin-
nitus, Marmarynges oculis obversantes excitantur, interaneorum gravi-
tates, nervorum plexuum mesentericorum, partiumque adjacentium
exoriuntur vellicationes, frequentes audiuntur Borborygmi; Diarrhæa
progignitur per intervalla repetens, colici doloris, & interdum futuri
quondam perniciosioris morbi Prodromus. Quid mirum? Consideranda
non solum veniunt crassiora hæc retenta, facta ab illis compressione,
vasa lymphatica, glandula, obstruuntur: Hinc tenuissimæ recremento-
rum in regiâ viâ, fluidorum in istis strictioribus locis stabulantium, &
incalescentium particula, nervos, membranas lancinant; vasa quoque su-
beunt sanguinea, in hisque omnibus corruptionem & confusionem pro-
ducunt; adeò verum est illud divini senis in Epidemiis oraculum: *ven-
tris torpor, omnium confusio*. Eapropter alvi excretionem moliri sanitatis
studiosi tentant, alimentis tenerioris substantiæ, concoctu faciliioribus,
alvumque emollire valentibus. At certius nequeas hæc mala vitare, vel
depellere, quàm si assiduò alicujus medicamenti usu, strictam nimis alvum
laxaveris; sic servaris laxatam, ut non amplius desidiosam esse sinas.

SEGNIS alvi duplex causa est; vitium succi digestivi; validior fibrarum intestina componentium textura. Succus iste in acidum degenerans, alimenta suis acuminibus si subit, horum principia suo si motu disjungit statim; sua simul rigiditate sulphura ligat, omnia que rursus confundit. Viscidior tunc producit Chymus, recrementa quoque daturus viscidiora. Hæc intra intestinorum canalem, quem lente percurrunt, diutius morantur. Per hanc moram invehitur siccitas. Interim à viscosâ excrementorum aciditate bilis retunditur. Induratis sic fecibus, feriandis sic fibris, non potest alvus non subsistere: naturalis fibrarum vis, duriorum vincendæ fecum resistentiæ impar, hanc superare nequit, alteratâ ac corruptâ bilis crasi, fibris aptæ natæ sollicitandis. Nullus verò sit licet, in coctione defectus; una validior intestinorum fibrarum textura, alvum pigram reddere valet. His occurritur causis, aliquid alimentis miscendo, quod naturalem Chymi, bilisque crasim restituat; quod validiorem leniat fibrarum texturam, cum opportunum adhibeat stimulum.

III.

UT brevior jam Systematum atas; obsoleta multum videbitur, quæ hic proponitur coctionis, subfalsi ope succi peragenda ratio. Coctio tamen pendet à fermentatione, quæ in ore inchoata, in ventriculo perficitur & absolvitur. huic quam ulli tritui satius ascribitur illa, quæ alimentorum est in sua principia; temporis intervallo breviori facta dissolutio. Ventriculus, ut intestina, motu potitur. Illius qualis qualis sit motus ad dissolutorum alimentorum massam paululum agitandam, chymumque infra propellendum inservit; ut horum Peristaltica agitatio, ad puriorem istius portionem in lacteas emulgendam, feculentiores que reliquias extra eliminandas. A fibris major quidem aut minor accedit materiæ corporis compagi firmitudo. Hæc unillarum virtus, quam sub eodem nomine veteres agnoverunt; ab illis principium vitale nullatenus fuit, nec functionum integritas, vel earum læsiones promanant. Fibræ ut bene se habent, à iusta humorum quantitate, & temperie; sic patiuntur ab eorundem vel colluvie, vel vitiositate. Reliqua quæ Geometrarum sunt apage, exactas dimensiones, rigidas supputationes; hæc flagrantiori Systematum amore in medicinam intrusa, progressui artis non minimè officijunt. Ecquid hanc inutilium Axiomatum, & computationum farragine inquinamus disciplinam! quam Hippocrates vir & arte, & facundiâ insignis, à sapientiæ studio, id est ab abstrusiori contemplatione separavit. Quæ medicorum sunt, amplexemur potius; datæ superius coctionis ra-

tioni insistamus; excretioni moliendæ necessariam dicamus fibrarum vim quam geometricè non supputemus. Huic professioni adhærentes, atque ut sensuales Physici, sensibus obvia consuetantes, proponemus id, quod alimentis, ad promovendam fœcum excretionem, adjici possit, abique cœtionis pervertendæ, excretionis properandæ metu.

IV.

DISSOLUTA in ventriculo alimenta, flexuosos intestinorum subeunt tubulos. Hoc itineris dum conficiunt, succus pancreaticus, bilisque ipsis admiscuntur, ut redintegratâ fermentatione attenuentur magis, puriorque eorum portio facilius separetur. Dum hæc fiunt, ex hujus leniter fermentantis massæ sinu, particulæ bilis exhalant, intestinorum motui conservando, ventri sarcinâ deonerando non inutiles. Hæc massa longiores necit moras, in coli anfractibus, in quibus præsertim ultimæ relinquuntur quiesquilæ, suam hic loci recepturæ consistentiam, ut ad rectum delatæ, foras tandem ejiciantur. Huic muneri inserviunt fibræ, quarum substantia quondam necessum est obtineat crassitiem, flexilitatis causâ, mollitie temperatam. Crassiores, rigidiores ve paulò intestinorum fibræ, peristaltico motu non probè defunguntur. Hinc quâ parte resistunt illæ, hæc subsistunt fœces, suâ morâ indurandæ; quæ aliis deinceps labentibus viam præcludant, hos obices non superaturis, ni earum tandem evecto sale laceffitæ fibræ, non sine dolore, & conamine, molestum onus segniter detrudant. Utriusque aliquod si levamen est, istud est in cassia ante cibum devoranda. Fistula est, quæ ab Ægypto ad nos advecta, maximè commendatur; includitque medullam usui Medico propriam. Hæc nigredine splendet; substantiâ pinguis est; sapore dulcis, aliquâ admixtâ acedine: quæ dotes inprimis faciunt, ad oppugnandam geminam astrictiōis alvi causam. Præpollens in succo digestivo acidum mitigat cassia; rigidiores demulcet fibras: dum illius spicula, vel suâ pingui substantiâ involvit; vel suo levioris acedinis sale frangit: dum has eadem substantiâ oblini; quas eodem sale perstringendo leviter irritat, & ad officium invitat.

V.

FŒCUM excretio, quæ naturalis purgatio est, ad artificialis modum se se habet. Acres Catharticorum sales, corruptis & viscosis immixti humoribus, dum fermentescunt, hos agitando incidunt, fluxiles reddunt, simul que fibras sarcinâ gravatas pungunt, ut fortius se contrahant ad noxia expellenda. Fibræ humoribus per morbum oppressæ, sua non pollent flexilitate; ad quam recuperandam, tùm sarcinâ levare, tàm aculeo excitari postulant. Simili ratione recrementa, quæ singulis,

aut alternis saltem rejicienda sunt diebus, in se ipsis habeant oportet, quod ipsamet fluxilia servert, fibrasque ad ea expellenda sollicitet. Istud desit; supplendum est, & bene quidem cassiâ ante cibum degluriendâ. Isthæc hujus utendæ methodus, cum antiquo consentit more, viam cibis muniendi, lenientibus & laxantibus primò sumptis. Neque quicquam inde timendum. Cassiam flatuum excitandorum notâ infamare velis, falleris; qui flatuum copiâ laborant, solatium ab eâ ante cibos sumptâ recipient, quam Clarissimi medici post cibum imperarunt, ad capitis dolorem post cibum ingruere solitum. Illam stomacho nocere, ipsum relaxare dicas; si istud metuendum, facile avertitur, addito rhei tantulo: id autem per rarò accidit, multos que potius videas, qui totam vitam vixerunt sanam, assiduo & quotidiano hujus medicamenti alimentosi usu. Quin & cassia cum alimentis præterlabens, eam non inducit molliem, quâ relaxentur fibræ; id unum potius præstat, ut istæ in singulos dies mitigatæ, pariter quoque excitatæ moveri discant, tandemque alvus suâ se sponte exoneret. Et id sanè multis ex frequenti cassiæ usu evenit; siue isthæc suâ pingui substantiâ, & sale suo acri, fermentum in glandulis stomachicis stabulans, atque succum digestivum corrumpens absolutè domet, siue suo leni aculeo fibras frequentius instigando, suum eas officium edoceat; quemadmodum excitator, somnum maturius discutere nos assuefacit. Quod igitur id afferre commodi, id beneficii præstare valet, illud ante cibum innôxiè sumendum, tam meritò audit; ut æqua, & bene deducta, hæc haberi possit conclusio,

Ergo alvo pigræ Cassia ante cibum.

Afferebat Parisiis ELIAS COL DE VILARS
Rupifocaldensis, Baccalaureus Medicus. A.R.H.S. 1712.

Apud Viduam Francisci Muguet, Regis & Facultatis Medicinæ Typog. 1712.